



VOL I NO 50

April 30, 1976

LAW DAY

EBEYE (LER) - Ekkar non rainin, April 30, 1976, ear wor juon kemem ear komon non kaibujuij ran in Law Day eo an dri America im dri Micronesia. Inem ilo ien in ear lon jet dri konono ro kar kir ir non e. Jet ian ro rar bok konair ilo ien in rar: Jalle Bolkeim, Magistrate, Ebeye Municipility, Mr. Brown, Dist Associate Judge, Dist Attorney Mr. Earwicker, Dist. Public Defender Mr. Lowe, KKK Congresswoman C. M. Bigler eo ej itok ikijen COM, Congressman T. Loeak eo ej itok ikijen Nitijela kab Iroij Lejellan Kabua, Kab Komja eo ad me ear lolorjake ien in bwe en maron in komon Mr. Larry N. Edwards.

Je konan bareinwot lelok aduij nan in kautej im kamolol dri utiej re-in ad. Ij bareinwot kile bwe juon men in ad utiej buru bwe rar bareinwot kejekron ien ko air raurok im eoron kir in.

Jej buromoj bwe ejjab aoleperuij jar maron in ber ilo ien in, jet rar utame im ber wot imokò ij jet rar ber ilo jikin jerbal ko air, mekarta, mene ar eindrein, jej likit ad nan in kamolol ro rar ber im kwelok non kejuij Jimor. Im jej tomak bwe jej ber wot ilo juon wot bebe im lemnak.

(lale col-2)

Jej bar elij nan in kamolol non ro rar bok kunair im lelorjake ien eo bwe en juon ien eo emon im bolemen. CKTAK ILO SCCLIAL SECURITY SYSTEM EO AN TRUST TERRITORY.

Jino jen July 1, 1976 enaj wor jet oktak ko ilo program eo an Social Security im renaj jelet aolep dri jerbal ro, ro rej kejerbal ir, ro im emoj air retire, family ko an dri jerbal ro remij im ro rar jerren jen jikin jerbal ko an kien.

Aolep dri jerbal ro kajojo ilo Trust Territory, jeddron jen ia, renaj aikuij in drelon iumin Social Security System eo an Trust Territory - ro wot im ebar wor juon system eo rej ooj none rejab maron drelon oloan karok in, einwot dri America ro rej ooj non Social Security System eo an United States.

Enaj bareinwot wor laplok ikijen money ko an armij ro kajojo im emoj air retire im ro renaj retire tok elik.

Emoj an bareinwot wanlinlok oran eo ikijen wonen juon dri jerbal non an ooj non Social Security jen \$960 lok non \$1,200, im bareinwot wanlinlok jen juon percent (1%) lok non 1.5% employee im 1.5% employer. Itok non Office eo an SSO.

LETTLR NON LDITCR

Dear Mr. Editor,

Bwelen emwij an kar walok kin we-win likao ro 2 rar etal (tourist) lok non Majuro. Lomarein ejap arm-ij bata, elukunin jijjet bwe Nit-ijela ran ren kar etal in wonmaiki erro im kir irro non kejota eo air eliktata, kinke, baj lale mok, won ran ilo Nitijela im won lomarcin 2 rar etal ilo tourists? Ne kojaje éokwe katak mokta geography in ka rshail inem kwonaj melele.

Likao rein jineir im jemair rar jab najidriki irro wot mona ko re-nne im kal ak rar bar katakin irro manit, etta buru, tiramc, jelelok-ijen, bareinwot. Likao rein molke ro ar jijet dre iloan plane eo, ak ien eo ke ej alikar ke elap an over passengers ilo ien in ledrik ro ilo wa eo rej kenono im kajitek bwe aikuij to 2 armij ilo ien in ewor kora ro rar iwe jen Majuro rej itok kin mission ko an Church, lemnak eo iben likao rein bwe irro en volunteer jutak im make kalikar ka irro eo irro ej to jen trip in inem irro ar to bwe irro ejap konan bwe ro jet ren loose i programs ko air im trip in.

Mel ke ejeja an walok armij rot in ilubwiljin armij, ak kinke likao rēn ejap armij bata, ejap raelep e an armij jela kajierro, kar baj jen atto wot jen jinojin wot airro kar baj (popular) ilo kajin Japan "NIEGKIMONO". Kinke jiner im jemair ejap kar armij wan kar baj jatre armij. Bwelen emon lok ne kwon lale bible ne am, lale mok: Filippai 2:3. "Komin jab komon jabrewot ilo walok ak aibuijuij jekdron, a kin etta buruomi jabrewot en lemnak ro jet remon jen e. Matthew 7:3-6 "Im eteke kwoj kalimjok belok edrik iloan mejen jeim im jatim a jab lemnak kin wijki iloan mejam? A ekijkan am ba non jeim im jatim, in jolok belok edrik jen mejam, im lo wijiki ej bed iloan mejam? Kwe dri jela mon, kwon jolok eo jen mejam mokta. Inem kwonaj lolokijen im jolok belok edrik jen mejen jeim im jatim. Komin jab

(lale cel-2)

lelok men eo ekojarjar non kiru rorrer ko, im jab julok bor ko ami iman pik ko, ne rab juri kin lab-iren neer, im oktak i, kakurre kom.

Ij lelok ao kamolol likao rein kin airro kar vonunteer im to ilo trip in bwe ro jet ren maron in jab loose ien ko air iben family ko air ak ien ko air iben ro jerair. Jej le bwe tourists rein 2 rar jab kautej irro make ak itto ar tiriamo kin ro jet. Komro kanuij emmol, ejimwe an jinimiro im jememiro kar katakini komro!!!!

JGK

* * * * * * * * * * * * * * * * *
JORREN EO NAE DRI-RONGELAF

Ikijen jorren eo ear walok nae dri Rongelap ilo an kar dri America test H-Bomb eo ilo Bikini ikottan 5 im 6 awa jimarokin March 1, 1954.

Moktata, ear walok lintak juon meram jen ion aijet ituion-turilik in Rongelap Atoll. Ear jino walok im ererak im kabwe aolepen mejatoto--ejelok meram einwot meram eo. Elon kain color ko raibuijuij im kaluoj ilo lali.

Ke ej jakolok meram eo, juon baat ej walok im bar ererak im kabwe lan. Ke ej driklok baat eo im nanin jako ej kab rub im edebokbokrainik-en elap im kammijak wot.

Armij ro rar jujen wot em ruj jen kiki kin lelnon im wiwijet. Jet rar ko non bulon mar im tilekek. Rar lemnok ej ran eo elik im ilo ba kake, jet rar ukwelok ak oktak wot ile ien eo.

Ilo kotaan in, 6 lok non 10 awa jibbonen fan eo, ejelok bar men ear walok. Armij rar jino etal non jerbal ko air - enod im men ko jet.

Elkin 10 awa jibbonen eo, ejjino wotlok powder im tab mejatoto. Ilotorein ear ketok 3 palun kotto im ekekke ion Rongelap im armij ro rar lemnok bwe unin an wotlok powder im (lale p-3 col-1)

ab mejatoto, palun ko rej unoke. Armij ro rar bwir im duwaj jen mo-ko imeir im aluji palun kein. Inem rej jino enjake an metak mejeir einwot ne jej belok. Powder eo ear lab lok wot im ej wotlok einwot snow. Manlok wot non 3 im 4 awa elkinraelepen ran eo, powder eo ej kabwe im kalbubu ion bwidej im keinikkan, im ene ko jimettan mile tolok, reban loi.

Ilo 10 awa bonin eo, armij rar jino enjake air naninmij laptata non ajiri ro, ro rar kauotata im kab-uromojmoj. Naninmij ko rar buki einwot, ebwenojnoj, abnono, jiemtak, molanlon, metak bar, metak lojilni, metak ni im aolep eketak ko ilo enbwin, ko im rar jab maron emak-itkit kaki.

Rujlok non ran eo juon, March 2, 1954, Magistrate eo im ro jet rar etale jorren eo im lo ke armij ro rar naninmij jen mona im dren ko rejorran. Color eo ilo dren in dak ko enanin einwot yellow en ekilmej im nemen, emcs lok jen kabwijlon. Kinmenin dri-tel rein rar kabwij-rak armij ro jen mona im idrak, botab, rerumij kinke emotlok 24 awa jen ke ear walok jorren eo..

Ilo 3 awa elkinraelepen ran eo, ar kelok juon palun in lojet jen Enewetak. Ruo wot armij rar toenetak. Armij ro rar kajitok ta-aerro jermal. Uak eo aer rar ba ke rej iten lale ewi kajur in an bomb eo jermal. Rar bar ba ke 20 wot minute in air bed iene. Botab ear iet jen 10 minute. Rar etal wot im likit kein kakolkol poison eo air na ilo juon aibwij lal im mokaj im rol. Ejelok juon nan in kakkol non armij ro.

Ilo jibbon tata in ran eo juon, March 3, 1954, ear walok juon wan tarinae im ektake ir non Kwajalein. Ke rej emakit jen Rongelap rar et-al mokta im bok 15 armij ro rar bed ilo Ailingae im itok wot non Kwajalein. Ilo ran eo, ej jino walok jet kain naninmij iben armij ro. Jet men einwot book in kijeek inbwinnier, kwoj botoktok iakkin neeir im peier, im jino wotlok
(lale col-2)

kolan borair.

Ke rej tokektok ionenin Kwajalein, March 4, 1954, ejelok juon uno ak komadmod rar lelok non ir ak men eo drein, bwe ren tutu iar jilu alen juon ran.

Ilo March 6, 1954, doctor ro an AEC rar tokektok ibeir ion Kwaja-lein. Rar bed ibeir iumin juon allin im jet ran. Ilo katan in ejelok uno, botab komadmod eo drein, bok botoktokier im lutoklok.

Jen 1954 non 1965, ejelok juon uno renanin kar lo non naninmij in. Ilo 1966, rej kab lo juon una ekkar non naninmij in. Uno in eo naeten synthroid. Uno in ewor ruo wewin. Bwe elane rejamin idrak unoin renaj mij. Im elane renaj jolok juon allen air idrak, meiel-en bwe rej jolok juon ran in air mour ilc lal in, Uno ejab maron jolok ebwoj eo iburuon armij rein. ak maron lukun kemmour armij jen poison in bomb eo.

Enin ej jinoan an dri Rongelap drelon ilo juon jorren eo im ear walok non ir ilo 1964 mantak non rainin. Ejanin wor juon komadmed eo dri America remaron in lukun kemour er jen poison in bomb,

J. A.

LOAN EBAYE RAININ STAFF

EDITOR	Steve Muller
ASSOCIATE EDITOR ...	Damien Ishoda Isaac Jorlang
PRINTER	Edison Kojje
STAFF	Irene Abraham Miriam Antibas Toj Lain Keslor Bolkeim Herinos Enos
ADVISOR	Larry Edwards